

«ՀԱՅԱՍՏԱՆԻ ՊԵՏԱԿԱՆ ՏՆՏԵՍԱԳԻՏԱԿԱՆ ՀԱՄԱԼՍԱՐԱՆ»
ՊԵՏԱԿԱՆ ՈՉ ԱՌԵՎՏՐԱՅԻՆ ԿԱԶՄԱԿԵՐՊՈՒԹՅԱՆ ԳԻՏԱԿԱՆ ԽՈՐՀՐԴԻ

ՈՐՈՇՈՒՄ

13 Հոկտեմբերի 2022, N 2 - 2

**2021-2022 ՈՒՍՈՒՄՆԱԿԱՆ ՏԱՐՎԱ ԵՐԿՐՈՐԴ ԿԻՍԱՄՅԱԿԻ
ՔՆՆԱՇՐՋԱՆԻ ԱՐԴՅՈՒՆՔՆԵՐԻ ՄԱՍԻՆ**

Լսելով և քննարկելով «2021-2022 ուսումնական տարվա երկրորդ կիսամյակի քննաշրջանի արդյունքների մասին» հարցը (զեկուցող՝ ուսումնական աշխատանքների գծով պրոռեկտոր, տնտեսագիտության թեկնածու, դոցենտ Ա.Վ.Գրիգորյան)՝ գիտական խորհուրդն արձանագրում է. կիսամյակի ընթացքում ռեկտորատը, ուսումնական բաժինը, դեկանատները և ամբիոնները հետևողական աշխատանք են կատարել քննաշրջանը կազմակերպված անցկացնելու ուղղությամբ: Կիսամյակի ընթացքում համահամալսարանական հիմնական առարկաների գծով կազմակերպվել և անցկացվել են գիտելիքների համակարգչային և բանավոր ստուգումներ: Ստուգումները կազմակերպվել են գործող կարգի պահանջներին համապատասխան: Քննագրաֆիլկների խախտումներ և ծախողումներ չեն արձանագրվել:

Ռեկտորատը, դեկանատները և ամբիոնները մեծ ուշադրություն են դարձրել ոչ միայն գիտելիքների ստուգման գործընթացի կազմակերպման և անցկացման, այլ նաև կիսամյակի ընթացքում ուսումնական գործընթացի պատշաճ կազմակերպման հարցերին:

2021-2022 ուսումնական տարվա երկրորդ կիսամյակի քննաշրջանին (առանց 1-ին և 2-րդ վերահանձնումների) մասնակցել են.

1. առկա ուսուցման բակալավրիատի 1-3-րդ կուրսերի 2453 ուսանող. նրանցից դրական գնահատականներ են ստացել 1908-ը կամ 78%-ը: Քննաշրջանից, 1-ին և 2-րդ վերահանձնումներից և առավելագույնը 12 կրեդիտ կազմող ակադեմիական պարտքերի վերահանձնումներից հետո համալսարանից հեռացվել է 66 ուսանող.
2. հեռակա ուսուցման բակալավրիատի 1-4-րդ կուրսերի 1655 ուսանող. նրանցից դրական գնահատականներ են ստացել 936-ը կամ 57%-ը: Քննաշրջանից, 1-ին և 2-րդ վերահանձնումներից և առավելագույնը 12 կրեդիտ կազմող ակադեմիական պարտքերի վերահանձնումներից հետո համալսարանից հեռացվել է 57 ուսանող.
3. առկա ուսուցման մագիստրատուրայի 1-ին կուրսի 312 ուսանող. նրանցից դրական գնահատականներ են ստացել 256-ը կամ 82%-ը: Քննաշրջանից, 1-ին և 2-րդ վերահանձնումներից և առավելագույնը 12 կրեդիտ կազմող ակադեմիական պարտքերի վերահանձնումներից հետո համալսարանից հեռացվել է 9 ուսանող.
4. հեռակա ուսուցման մագիստրատուրայի 1-2-րդ կուրսերի 78 ուսանող. նրանցից դրական գնահատականներ են ստացել 73-ը կամ 94%-ը: Քննաշրջանից, 1-ին և

2-րդ վերահանձնումներից և առավելագույնը 12 կրեդիտ կազմող ակադեմիական պարտքերի վերահանձնումներից հետո համալսարանից հեռացման ենթակա ուսանողներ չեն եղել:

Առկա ուսուցման բակալավրիատում ուսման առաջադիմությունը կազմել է 78%: Այն նվազել է վերջին 3 տարիների նույն քննաշրջանի ցուցանիշի համեմատությամբ (2020-2021՝ 83,5%, 2019-2020՝ 84,7%, 2018-2019՝ 86,9%), ինչը հիմնականում պայմանավորվել է 2020 թվականից ակտիվության գնահատման մեխանիզմների փոփոխությամբ և գործընթացի նկատմամբ սահմանված հավելյալ վերահսկողությամբ: Առկա ուսուցման մագիստրատուրայում ուսման առաջադիմությունը կազմել է 82% (առաջին կիսամյակում՝ 87,6%), հեռակա ուսուցման բակալավրիատում՝ 57% (առաջին կիսամյակում՝ 59,2%) և հեռակա ուսուցման մագիստրատուրայում՝ 94% (առաջին կիսամյակում՝ 88,2%): Նախորդ տարվա առաջին կիսամյակի քննաշրջանի համեմատությամբ ուսման առաջադիմությունը առկա ուսուցման բակալավրիատում նվազել է 2,4%-ով, առկա ուսուցման մագիստրատուրայում՝ 5,6%-ով, հեռակա ուսուցման բակալավրիատում՝ 2,2%-ով, իսկ հեռակա ուսուցման մագիստրատուրայում բարելավվել է 5,8%-ով: Առկա ուսուցման համակարգում ուսման առաջադիմության ցուցանիշն ըստ ուսումնառության տևողության կայուն միտում չունի:

Առկա ուսուցման բակալավրիատի 1-ին, 2-րդ և 3-րդ կուրսերում ուսման առաջադիմությունը համապատասխանաբար կազմել է 75%, 82% և 78%: Առկա կրթաձևում ուսանողների շուրջ կեսն ունի «բավարար» գնահատական 3 տարիների ընթացքում, սակայն «գերազանց» գնահատական ունեցողների տեսակարար կշիռն ըստ ուսումնառության տևողության աճի միտում ունի. որքան երկարում է ուսումնառությունը, այնքան «գերազանց» գնահատական ունեցող ուսանողների տեսակարար կշիռն ավելի բարձր է (համապատասխանաբար՝ 5%, 9%, 13%): «Լավ» գնահատական ունեցող ուսանողների տեսակարար կշիռը կայուն միտում չունի (համապատասխանաբար՝ 17%, 23%, 19%): Հեռակա ուսուցման բակալավրիատի 1-ին, 2-րդ, 3-րդ և 4-րդ կուրսերում ուսման առաջադիմությունը համապատասխանաբար կազմել է՝ 50%, 65%, 53% և 58%: Հեռակա կրթաձևում «գերազանց» և «լավ» գնահատականներ ունեցողների տեսակարար կշիռն ըստ ուսումնառության տևողության ևս հիմնականում աճի միտում ունի (համապատասխանաբար՝ 1%, 4%, 8%, 7% և 5%, 6%, 6%, 10%): Բակալավրիատում, ըստ առանձին կրթական ծրագրերի, ֆինանսական, մարքեթինգի և բիզնեսի կազմակերպման ֆակուլտետներում ուսման առաջադիմությունը զգալի բարձր է համալսարանի ուսանողների միջին առաջադիմության ցուցանիշից, հաշվապահական հաշվառման և աուդիտի, ինֆորմատիկայի և վիճակագրության ֆակուլտետներում զգալի ցածր է միջինից, իսկ մնացած ֆակուլտետներում այն մոտ է միջինին: Մագիստրատուրայում, ըստ առանձին կրթական ծրագրերի, ֆինանսական, հաշվապահական հաշվառման և աուդիտի, մարքեթինգի և բիզնեսի կազմակերպման ֆակուլտետներում ուսման առաջադիմությունը զգալի բարձր է համալսարանի ուսանողների միջին առաջադիմության ցուցանիշից, տնտեսության կարգավորման և միջազգային տնտեսական հարաբերությունների

Ֆակուլտետում՝ զգալի ցածր է միջինից, իսկ մնացած ֆակուլտետներում այն մոտ է միջինին: Կույր գնահատման սկզբունքով գիտելիքի ստուգման և բանավոր քննությունների արդյունքները ամփոփիչ քննությունների փուլում գրեթե միանման են, սակայն վերահանձնումների փուլում բանավոր քննությունների արդյունքները զգալի տարբերվում են համակարգչային քննությունների արդյունքներից:

Արձանագրելով կատարված աշխատանքները՝ գիտական խորհուրդը, միաժամանակ, նշում է, որ դեռևս կան թերություններ և չլուծված խնդիրներ.

1. Թեպետ ուսանողների ակտիվության գնահատումը հետզհետե ավելի արժանահավատ է դարձել և մոտեցել է համակարգչային քննություններից ուսանողների ապահոված արդյունքներին, սակայն գնահատման անաչառությունը դեռևս շարունակում է մնալ ոչ բավարար:
2. Թեպետ բանավոր և համակարգչային քննությունների արդյունքները ամփոփիչ քննության փուլում միմյանց էապես մոտեցել են առկա ուսուցման բակալավրիատում, սակայն վերահանձնումների փուլում դրանք էապես շեղված են և շարունակում են մնալ ոչ բավարար մակարդակի վրա: Հեռացումների 95 և ավելի տոկոսը պայմանավորված է ուսանողների համակարգչային քննությունը չհաղթահարելու հանգամանքով:
3. Ամբիոններն իրենց սպասարկած մասնագիտական կրթական ծրագրերի ուսանողներին ավելի բարձր են գնահատում, քան դրանք չսպասարկող ամբիոնները:
4. Միջին առաջադիմության ցուցանիշից, ըստ տարբեր ֆակուլտետների և կրթական ծրագրերի, առկա են էական շեղումներ:
5. Ուսանողների ուսումնառության, գիտելիքի գնահատման և վարչարարության կազմակերպման կարգերի ներդրումից հետո հեռակա ուսուցման բակալավրիատի կրթական ծրագրերի միջին առաջադիմության ցուցանիշը շարունակում է մնալ մտահոգիչ ցածր:
6. «Լավ» գնահատականով քննաշրջանն ամփոփող ուսանողների տեսակարար կշիռը շարունակում է մնալ մտահոգիչ ցածր մակարդակի վրա:
7. Ուսանողական հարցումների արդյունքները և ուսանողների կողմից իրենց դասավանդողների մատնանշումները փաստում են, որ չնայած դասախոսների կողմից միմյանց փոխարեն դասընթաց վարելու դեպքերը շեշտակի նվազել են, սակայն դեռևս առկա են առանց դեկանատների իմացության իրականացվող նման դեպքեր:
8. Ուսանողական հարցումների արդյունքները փաստում են, որ թեպետ արդիական գրականությամբ ապահովվածության խնդիրը հիմնականում լուծվել է, սակայն դեռևս առկա են հայալեզու գրականության և նյութերի տրամադրման խնդիրներ:
9. Թերություններ կան դասախոսների կողմից ուսանողների հաճախումների, ակտիվության գնահատման և էլեկտրոնային մատյաններում ամփոփման աշխատանքներում:

Ելնելով վերոգրյալից՝ «Հայաստանի պետական տնտեսագիտական համալսարան» պետական ոչ առևտրային կազմակերպության գիտական խորհուրդը **որոշում է**.

1. Հանձնարարել ռեկտորատին՝

- 1) արձանագրված թերությունների վերացման համար մշակել որոշակի միջոցառումներ՝ նշելով պատասխանատուներին,
- 2) ամբողջացնել ուսումնական գործընթացի կազմակերպման և վարչարարության իրականացման կարգավորումների համակարգը՝ ապահովելով դրանց ներդաշնակությունը առկա և հեռակա կրթածնեերում,
- 3) ներդնել դասախոսների կողմից իրենց ուսումնական բեռնվածությամբ և պաշտոնի անձնագրով նախատեսված աշխատանքների մշտադիտարկման և չկատարման դեպքում աշխատանքի վարձատրության վերահաշվարկի կառուցակարգեր:

2. Հանձնարարել դեկաններին՝

- 1) ֆակուլտետների գիտական և խորհուրդների նիստերում քննարկել ՀՊՏՀ գիտական խորհրդի որոշումները, հետևողական լինել դրանք ժամանակին կատարելու և արձանագրված թերություններն ու բացթողումները շտկելու հարցերում,
- 2) դասախոսների և ուսանողների դասաձախողումների դեպքերը քննարկել ֆակուլտետների գիտական խորհուրդների և ամբիոնների նիստերում՝ անհրաժեշտության դեպքում հարցը դարձնելով նաև ռեկտորատի քննարկման առարկա,
- 3) գնահատականների, վերահանձնումների, հեռացումների միջին վիճակագրական ցուցանիշներից շեղում ունեցող գնահատականները դարձնել ֆակուլտետների գիտական խորհուրդների քննարկման առարկա՝ վերհանելով պատճառները,
- 4) խիստ հսկողություն սահմանել էլեկտրոնային մատյանների լրացման նկատմամբ,
- 5) երկու ամիսը մեկ պարբերությամբ իրականացնել մասնագիտական կրթական ծրագրերի ակադեմիական խմբերի ակտիվության գնահատականների մշտադիտարկում,
- 6) ուժեղացնել ֆակուլտետի վերահսկողությունը հատկապես ակտիվության բաղադրիչի գնահատման և բանավոր քննությունների վերահանձնումների նկատմամբ:

3. Հանձնարարել ամբիոնի վարիչներին՝

- 1) պարբերաբար իրականացնել դասալսումներ և խիստ մշտադիտարկում իրականացնել ամբիոնների դասախոսների, հատկապես միջին ցուցանիշից էապես շեղված գնահատման քաղաքականություն ունեցող դասախոսների գնահատման պրակտիկայի նկատմամբ,

- 2) խիստ վերահսկողություն սահմանել Moodle հարթակ վերբեռնվող նյութերի բովանդակության նկատմամբ,
 - 3) իրականացնել ամբիոնի պրոֆեսորադասախոսական կազմի կողմից իրենց պաշտոնների անձնագրերով սահմանված գործառույթների և պայմանագրային պարտավորությունների պատշաճ կատարման մշտադիտարկումներ՝ արդյունքները քննարկելով ամբիոնի նիստերի ընթացքում:
4. Սույն որոշումը քննարկել ամբիոնների և ֆակուլտետների գիտական խորհուրդների նիստերում, մշակել միջոցառումներ ուսումնական գործընթացը բարելավելու ուղղությամբ:
 5. Սույն որոշման կատարման նկատմամբ վերահսկողությունը վերապահել ուսումնական աշխատանքների գծով պրոռեկտոր Ա.Վ.Գրիգորյանին:

Գիտական խորհրդի նախագահ՝

2022 թ. հոկտեմբերի 13
Երևան



Դ. Ռ. Գալոյան